

KOROSO

Paoro Iokanatsopatakiti Koroso Auakanimoni

¹ Nota Paoro. Niokanatsopata hĩtemoni. Teoso mereẽno nota, kotxi inirekari nota Xesosi Kristo iokanatakiti nininiua. Aĩtari Tximótxio apaka iokanapireta hĩtemoni. ² Ininiã aiokanataria iõkatsopari Teoso nakitiakorimoni, ikinika Teoso paniãtakiti kamakanimoni Koroso sitatxiti auakanimoni. Aĩtariakori hĩtxaua. Aĩri Teoso, Apiananiri Xesosi Kristo pakini sikari ikinipoko erekari hĩtemoni. Ninoa kamaerekaxiniretai hĩte.

Teoso Misãkiretiko Koroso Auakani Ĩkapani

³ “Erekapitikai,” atxari Teoso, aãũite Xesosi Kristo iri, iua amisãkiretakasaaki hĩte ĩkapani. Ātipirika amisãkiretari Teoso hĩte ĩkapani. ⁴ Ikara atoko atxari Teoso, kotxi ate kenakopiretari hĩte auikiniri Kristo Xesosi sãkire. Apaka akenakopiretari hĩte tiretiniri ikinika kãkiti Teoso nakitiakori. ⁵ Teoso iokanapirena erekari atão sãkiretxiti itxaua. Ikara hĩkenakotakasaaki, hĩkenakotari Teoso sikaenetakiti ipotetakiti itixineẽ hĩte ĩkapani, ininiã hiãtapari hãpakapiniri Teoso sikaenetakiti. Himarotari hãpakapiniri, ininiã Teoso sãkire hãũikini aua, hĩtiraõkuiatini pakini aua. ⁶ Teoso iokanapirena erekari hĩkenakotakiti iaripiretapeka ikini itixitimoni. Ikiniõtika apikomoni kãkiti kenakotari. Iuasaaki kãkiti auikaãpotari Teoso iokanapirena. Ikiniõtika kãkiti apakapari erekari Teoso sikakiti. Iua

atokokana hīte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atāo sikiniri ikinipoko erekari kākitimoni.

⁷ Amoianari, atiretakiti, Epápara inakori, iuara oerekai Teoso sikiniri ikinipoko erekari kākitimoni. Iua Kristo nitiri itxaua. Ātipirika iparīkauata Kristo ĩkapani, ininiã ātipirika iparīkauata hīte ĩkapani. ⁸ Iua sãpiretaua ate hītiraõki, Erekari Matamatakoti siãkiti hītemoni.

⁹ Hīte pirena akenakopiretakasaaki, ātipirika amisãkiretari Teoso hīte ĩkapani. Ate nirekari hīte iteene imarotiniri Teoso nireẽkiti hīkamini ĩkapani. Anirekari kiĩkiteni hininiãua. Anirekari himarotiniri Teoso imarore Erekari Matamatakoti siãkiti.

¹⁰ Ininiã ate misãkiretari Teoso hīte atāo hīkamini ikiniõtika, kotxi Apiananiri anaakori hītixaua. Anirekari hīkamakiti kamapoxokonitini Teoso. Ininiã hīkamakiti ikiniõtika erekarinoka, amãtiiri erekari atoko. Ininiã ikiniõtika himaroãpotari apikomoni Teoso nireẽkiti. ¹¹ Anirekari Teoso sikataparaxiniretinii hīte iposotiireẽ, kotxi kaposotiireri iua. Ininiã iuasaaki hiãtapari himisiritiko xipokini. Iuasaaki ! hinaiataua. Iuasaaki hīposotari himĩteenekiniri himisiritiko hīpoxokoniritika. ¹² Iuasaaki hītixariko aĩri: “Erekapitikai,” kotxi iua kamaerekataua. Ininiã aãpakapari iua potetakiti inakitiakori ĩkapani Teoso tixineẽ, ipiã mauakaniãtaã. ¹³ Iua sikakaua ipiã posotiireẽ aãuakasaaki, maerekati posotiireẽ aãuakasaaki. Iua anikaua imi itiretakiti auiniãtaã. Iuaãtaã auakani auĩte itxaua imi. ¹⁴ Imi Kristo ĩkitxitari Teoso amaerekani ĩki ipĩkasaaki, ininiã

Teoso makatxakari amaerekani. ! Ixinikaikari amaerekani.

Kristo Apiananiri

¹⁵ Kākiti kona posotari atamatiniri Teoso. Teosotxikana itxaua Kristo, iuaritika aposotari Kristo aātamadini. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kākiti atamatakiti, kākiti matamatakiniti apaka. Ikamari ikinika kaposotiirerini, auñtetxiakori matamatakoni, ikinika Teoso nitiriakori pakini. Ikamari ikinika. Ikinika kamaāka iua ĩkapani. ¹⁷ Kristo aua ikinipoko apisa. Iua maĩkari ikinika imaxipokakani ĩkapani. Ikara atoko ininiā, ikinipoko auapanika. Iua mauakaniā, ikinika iarika. Iua mauakaniā, ikinipoko xipoka.

¹⁸ Kākiti Teoso mereēkini Kristo ĩto atoko itxauana. Teoso mereēkini kii atoko itxa Kristo. Merepitipanika ipĩkari ōkitikakariua iua. Ininiā ōkitikasaakiua, oerekari kākiti Apiananiri ininiua. Āti kaposotiireri iua atokokana inakari ! auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arēka xiketakasaaki aamina ĩpiriāmitakari nopini, iuasaaki Kristo xipokari Teoso omanākarauatini kākiti maerekani xika. Kotxi Teoso nirekari Kristo mininiri ikinipoko iuaĩkana iuamoni, ĩkorapokoriti auakani, iaxiti auakani pakini. Ininiā uatxa Teoso apakapari Kristo sākire auiākani.

Kristo Kamakiti Koroso Auakani ĩkapani

21 Hītepekana, mitxi ! himarotari Teoso. Iuasaaki ! hāuari Teosokata. Maerekati hīkamakiti xika homanatarī Teoso hākixinireē. Teoso mokaiakariakori hīt_xaua iuasaaki. Uatxa Teoso apakapai hīte, ²² kotxi Kristo īto ipina hīte īkapani. Ininiā iua anikai hīte Teosomoni iua makatxakakini hininiua īkapani. Teosomoni himaerekani ! auaike, kotxi Kristo makatxakapekari imakinika himaerekani. Teoso apisatoō hāpokasaaki, kona āti posotari apoītinii himaerekani xika. ²³ Ikara atoko aua hītemoni, iteene hāuikiniāri Kristo sākire ikiniōtika, Kristo sākirenoka hāuikiniā, isākire himatakanapakaniā. Ikara atoko hīkaminiā, apanakini kona t_xīkitakai hītakanapiniri hiātapiniri ikinika Teoso kamakiti hīte īkapani. Teoso iokanapirena erekari sāpiretaua ikinika Teoso kamakiti inakitiakori īkapani. Hīte kenakotapekari Teoso iokanapirena erekari. Isāpiretaākapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisāpiretini īkapani.

Paoro Parīkauata Kākiti Teoso Mereēkini Īkapani

24 Uatxa nipoxokoniua hīte īkapani natatsiirauatini, kotxi natatsiirauatini xika hīte auikari Kristo sākire. Natatsiirauata niītoā Teoso mereēkini īkapani. Kristo īto atoko itxauana kākiti Teoso mereēkini. Natatsiirauatapitika, iuaritika Kristo atatsiirauatini apiata. ²⁵ Teoso iokanatano nota imereēkini nitiri nininiua. Ipaniātano nisāpiretiniri ikinika isākire hītemoni. ²⁶ Ipaniātano nisāpiretinii mitxi kākiti mimarotakiniti. Okananipeka Teoso ! oerekari ikara kākiti mimarotakiniti. Kristo ipinini apisa ikini

itixiti auakani ! imarotari ikara. Mitxi kākiti mimarotakiniti uatxa oerekaāka Teoso nakitiakorimoni. ²⁷ Uatxa Teoso nirekari inakitiakori Xoteo minakaniua imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisāpiretai. Kristo posotari kākiti ākixinireē auini. Ia mitxi kākiti mimarotakiniti. Kristo aua hākixinireē. Ininiā himarotari hīsini Teoso tixinemoni. ²⁸ Ininiā asāpiretari kākiti Kristo pirena. Aōtākikari ikinimane Teoso imaroreē. Aōerekari ikinimane Teoso imaroreē, kotxi Teoso sikaimaroretāua. Iua aua ikinika imaroretxi. Ikara atoko aanikana Kristo nireēkitinoka kamakani Teosomoni. ²⁹ Ikara nikamini ikapani, niparīkauatapitipo. Pasāpaniri. Kristo posotiireē niparīkauata, kotxi kaposotiireri iua. Iua iteene sikataparatarari nākixinire, ininiā niposotari iteene niparīkauatini iua ikapani.

2

Paoro Nirekakiti

¹ Ninirekari himarotiniri iteene nimisiritiko hīte ikapani. Apaka iteene nimisiritaāka Araotxiséia sitatxiti auakani ikapani. Nimisiritaāka apanakini nimataōkitakini ikapani apaka. ² Ninirekari ikinimane ninoa kataparaxinire ininina. Apaka ninirekana itiretakiniuana, ininiā ātika ninoa nireēkiti. Ikara atoko ininiāna, iteene imarotarina ikinika Teoso sākire. Iuasaaki imarotarina Kristo, mitxi kākiti mimarotakiniti, mitxi aīri Teoso moerekakiniti. ³ Paimatireri Kristo. Iua mimarotakiniti ! auari. Ikinipoko imarota. ⁴ Ikara atoko nisāpiretai hīte, apanakini mamisirienetakanii tīkane kākiti imaroreē. ⁵ Nīto ! auari hītekata, iuaritika nixinikapikai hīte

nākixinireē. Nipoxokoniyata, kotxi nimarotari hīkamakiti atāo inini. Apaka nipoxokoniyata, kotxi hīte iteene auikari Kristo sākire.

Atāo Kristo Sākire Auiākani Kamakiti

⁶ Hāpakapapekari Kristo Xesosi hīauīte ininiua īkapani, ininiā hīkamariko inirekakiti ikiniōtika.

⁷ Iua taparanoka hīkosekako. Aākotsa kosekiniri āparaā atoko hītḡako. Ikara atoko hininiā, kataparari hīxinire. Ininiā atāo hāuikari Kristo sākire mitxi aōerekakiti atoko, ininiā kataparaiko. Ininiā iteene hītḡariko Teoso: “Ikinika pikamakiti ate īkapani peerekari,” hītḡako.

⁸ Erepaniko. Kona hāuiritapiri kākiti makatḡakinii Teoso kimaporeē. ! Hāuikapiri ninoa sākire, kotxi ātiāo ninoa sākire. Na atāo isākirena. Kākiti imarorenoka imarotana. Kamisirienererini ninoa. Maxikatīka isākirauatana. Kitḡakapirīka auakani sāpiretakiti ninoa sākire. Īkorapokoriti auakani nireēkiti maerekati isāpiretana kākiti. Kona Kristo sākireni.

Apiananiri Itḡaua Kristo

⁹ Kristo aua iīto, iuaritika Teosotḡikana iua. Kristo aua ikinipoko Teoso posotiire, ikinipoko itiraōki, ikinipoko imarore, tḡaāpokata, kotxi Teoso itḡaua. ¹⁰ Kristo aua hākixinireē, ininiā ikinipoko aua hītemoni. ! Auari apikomoni hinirekakiti, kotxi auītḡxiakori iaxiti auakani auīte itḡaua. Apiananiri itḡaua. Kaposotiireri iua atoko inakari ! auari.

Kristo Kamakiti Hīte īkapani

¹¹ Hāpakapapekari Teoso takaōḡḡikare kākiti mataākiniti. Hākixinireē Teoso takari itakaōḡḡikare.

Kristo makatxakasaakiri himaerekani hĩto nirẽkiti, iusaaki hãpakapari Teoso takaõtxikare. ¹² Hĩpatxisatikosaaki, Kristokata ikatakoni atoko hĩtxaua. Eereka hõkitikaãka Kristo õkitikiko atoko. Hĩte õkitikaãkako, kotxi hĩte auikari Teoso posotiire Kristo õkitikini ipĩkasaaki.

¹³ Mitxi ipĩkani atoko hĩtxaua himaerekani xika. Xoteo minakaniua hĩte, ininiã mitxi kona himarotari Teoso nirẽkiti. Hĩponaniãkasaaki, maerekati auape hĩtemoni. Iuaritika Teoso txĩkitakai auãki hinini Kristokata. Teoso makatxakari ikinipoko himaerekani. ! Ixinikaikari himaerekani. ¹⁴ Iua oakari iõkatsopatakori amaerekani sãpiretiko. Ikara iõkatsopatakori sãpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iõkatsopatakori. Imaktxakari ikara iõkatsopatakori. İpiriãmitakari nopini Kristo tokakitikosaaki, ikara iõkatsopatakori tokakitaãka apaka iuaã, ininiã !itxaika. Iusaaki amisiritiko !auaika. ¹⁵ Kristo İpiriãmitakari nopini ipĩkasaaki, iusaaki imaktxakari ikinika Satanasi posotiire, initiriakori posotiire pakini. Iua oerekari ikinimane !kaposotiirena ninoa. Iua õkitikasaakiua, oerekari ikinimane iuananira Apiananiri ininiua. Iusaaki Kristo oerekari ikinimane ikãiatini.

¹⁶ Ininiã kona hãuiritapiri apanakini txitinii hinikakiti xika, hiãtakiti xika pakini. Kona hãuiritapiri apanakini txitinii kiiniri Teoso İkapani hĩkamini xika, kiiniri kasiri itopaĩtakasaaki hĩkamini xika, kiiniri tomatiko õti hĩkamakiti xika pakini. ¹⁷ Kiiniri Teoso İkapani İkorasaaki sanõkatxi atoko itxa. Oerekaua atão inakari, txamari na

iteene oerekaua. Iteene oerekaāka atemoni, Kristo aōkitakasaaki. ¹⁸ Erepaniko kākiti ia atoko inakari: Ninoa iuikari imiuikakaniuana. Ninoa teosonetari Teoso nitiriakori matamatakoni. Ninoa sāpiretari kākiti matamatakoni aōkitinina itaponeēna. Ixinikarina ninoaka nireēkitinoka. Ixinikarina kimarorerini ininiuana, ininiā iuikauana. Erepaniko kākiti ikara atoko inakani. Hāuikiniāri ninoa sākire, ! auaika hīparīka īki. ¹⁹ Kākiti ikara atoko inakani ! inirekari Kristo iauītena ininiua. Kotxi Kristo akii atoko itxa. Ate iua īto atoko atxaua. Ikara atoko ininiā, isikataparataua. Aāpotiitaua. Asikataparatakakaua. Ātika ītotxi atoko atxaua. Ikara atoko aniniā, aimaroāpotari isākire. Aaneē, kākiti īto aneini atoko.

Apinini, Aāuini Pakini Kristokata

²⁰ Mitxi hinireēkiti itixi auakani nireēkiti atoko. Hāuikasaakiri Kristo sākire, mitxi hinireēkiti ! auaika. Ipīpe. Txamari hīkamapanikari īkorapokoriti auakani kamakiti atoko. Ninoa nireēkiti iaōka hīkamapanika. ²¹ Ninoa txari: “Kona pimaīkapiri ikara. Kona pinikapiri ikara nipokori. Kona piouātakapiri ikara.” Kinirepa hīkīpitari ikara isākirena? ²² Ninoa paniātakiti xipokapitikako. Ikara atoko ! itxa, kotxi ikara atoko inakari paniātakori kākitinoka paniātakiti. Kākiti oerekakiti sākiretxitinoka ikara. ²³ Kākiti uākatari ninoa paniātakiti kimarorerini paniātakiti atoko. Ninoa xinikakiti iaōka inirekarina Teoso. “! Erekanō,” itxana, txamari ākixinireēna itxana “Peerekano.” Ninoaka misiritaua iītoāna. Ikamarina ikinika iītona nireēkiti.

3

Atão Hĩkamakiti Erekarĩ Hãuini Īkapani

¹ Hĩte õkitikaãka Kristokata hãuini amaneri inini ĩkapani, ininiã hinirekariko hĩkaminiri Teoso tixine auakani kamakiti iaõka. Iuaã Kristo topãkanãta Teoso kikomoni. Apiananiri itxaua Teoso kikomoni topãkakari. ² Hĩxinikariko Teoso tixine. Kona hĩxinikapiri ĩkorapokoriti. ³ Ipĩkani atokopeka hĩtxa, kotxi hãuini kitxakari !auaika, ininiã kona hĩxinikaikari ĩkorapokoriti auakari. Teoso sãkire mauĩãkani !imarotari hãuini amaneri Kristokata Teoso auiniãtaã. ⁴ Kristo txĩkitakari aãuini amaneri inini. Iua uai apokasaaki iuaĩkana atamataãka. Iuasaaki hĩte apaka atamataãka iuakata. Iuasaaki hĩtemoni auari Kristo iotximere atokokana. ⁵ Hĩxipokariko hĩito nireẽkiti, kotxi ĩkorapokoriti auakari nirekarĩ ĩtotxi nireẽkitinoka. Hõkariko. Kipa aua aãkixinireẽ aõkini ĩkapani? Auari anokaretxi. Auari aĩto nireẽkitinoka kamiko nirekiko. Auari ãti ĩto nirekiko. Apaka auari ãti nakiti nirekiko aãkixinireẽ. Iteene anirekiniãri ãti nakiti, ateosone atoko itxaua anireẽkiti. ⁶ Ikara maerekati xika, Teoso omanãkare apokapitikako Teoso paniãtakiti makĩpitakanimoni. ⁷ Mitxi hĩte kamari maerekati ikara atoko inakari. Iuasaaki hĩtotapekari ikara atoko inakari hĩkamini. ⁸ Uatxa ia atoko inakari hĩtakanapako: omanãkaretxi, ãti iteene txitiko, Teoso misãkirepiretiko, maerekati sãkiretxiti pakini. ⁹ Kona himisirienetakapeua, kotxi hĩtakanapapekari maerekati mitxi hĩkamakiti. Himãka kitxakari hõkini atoko, hĩtakanapapekari ikara maerekati.

¹⁰ Uatxa hĩkamakiti amaneri. Himãka amaneri hĩretakini atoko, hĩkamakiti uatxa amaneri.

Teoso txīkitakari hīkamakiti amaneri inini, ininiā himarotari atāo inakari imaroretxi. Ininiā Teoso kamakiti atokokana hīkama, kotxi hīte kamakari itxaua. ¹¹ Uatxa kākiti apiari !auari. Krekoakori, Xoteoakori, Teoso takaōtxikare auaiñtotakini, Teoso takaōtxikare mauaiñtotakini, mimaroreni, kākiti itopa auakani, nitiritxi amotakoni, kākiti miamotakoni pakini !auari kākiti apiari. Āti kākiti āti kākititxikana, kotxi Kristonoka Apiananiri. Iua auu ikinimane isākire auaiñakani ākixinireē.

¹² Ininiākara hiamonīkariko āti. Hīkamariko erekari ātimoni. ! Hīuikapeua. Kaneenama ! hītxape. !Katimari homanākarauatini. Ikara atoko hāuako, kotxi Teoso mereēkini, iua nakitiakori, itiretakini hītxaua. ¹³ Himīteenekakakauako. Himaxinīkaretariko apanakini kamakiti, hīte mapokaerekatakiniti. Kristo maxinīkaretapekari maerekati hīte kamakiti, ininiā iua atokotxikana himaxinīkaretariko maerekati apanakini kamakiti hītemoni. ¹⁴ Ikara erekari hīkamako. Erekari apiari hīkamini, hītiraōkiuatini. Hītiraōkiuatako. Hītiraōkiuatakasaaki, ininiā iuasaaki ikinika hīkamakiti atāo.

¹⁵ Kristo kamaerekaxiniretai, ininiā erekari hākixinire. Hāuiritariko ikara erekari kaikotini. ! Hīkamapiri ikara erekari makatxakiko ikapani. Hīkinika ātika itotxi atoko hītxaua. Teoso akiritai hīte hākixinire ereka inini ikapani. Hītchariko Teoso ātipirika: “Erekapitikari pikamakiti nota ikapani,” hītxako. ¹⁶ Hāuiritariko ikinika Kristo sākire kaikotini hākixinireē, ininiā iuasaaki himarore iteene auu. Hōerekakakaua. Hōtākikakakaua. Hīxikaretari xikari Teoso ikapani. Hīxikaretariko xikari Teoso sākire iōkatsopatakori xikariti. Hīxikaretariko xikari kitxakari, amaneri pakini

Teoso ĩkapani. Hĩxikarauatakasaaki, hãkixinireẽ hĩtxariko Teoso: “Erekapitikari pikamakiti nota ĩkapani.” ¹⁷ Ikinika hĩkamakiti hĩkamako Apiananiri Xesosi ĩkapani. Hĩsãkirauatakasaaki, hĩsãkirauata Apiananiri Xesosi ĩkapani. Iuasaaki hĩtxariko aĩri Teoso: “Erekapitikari pikamakiti nota ĩkapani,” hĩtxariko.

Kãkiti Aapoko Auakani Ôtãkikiko

¹⁸ Hĩte ĩtanorotxi, hĩkĩpitariko hĩtaniri sãkire, kotxi Apiananiri nakiti hĩtxaua, ininiã ikara atão hĩkamini.

¹⁹ Hĩte ĩtaniritxi, hĩtiretaroko hĩtanoro. Kona hĩtxitapero oa. Kona homanatapero.

²⁰ Hĩte amarini, hĩkĩpitariko hĩri, hinoro pakini sãkire. Ikinika ninoa paniãtakiti hĩkamako, kotxi Teoso apokaerekatari ikara atoko inakari.

²¹ Hĩte irĩtxi, kona hĩkamanaiamanetapena hamariteakori, kotxi eereka maerekaxinireti aua ninoamoni, ininiã !inirekaikarina hĩte paniãtakiti ikaminina.

²² Hĩte nitiritxi, hĩpatrãote ĩkorapokoriti aua, ininiã hĩkamariko ikinika ninoa paniãtakiti. Apanakini iteene parĩkauata ipatrãote apisatoõ, iua apokaerekatiniri ĩkapani. Iua mauakanisaaki apaka iteene hĩparĩkauatako. Ikini hĩxinireritika hĩkamariko hĩparĩka. Ikara atoko ininiã, atão hĩpaxitari Teoso. ²³ Ikinika hĩkamakiti hĩkamako hĩtaparaxinireritika. Hĩparĩkauatakasaaki, parĩkatxi Apiananiri ĩkapani hĩkamini atokotxikana, hĩparĩkauata kãkiti ĩkapani. ²⁴ Hĩparĩkauatako ikara atoko, kotxi himarotari Apiananiri sikinii ipotetakiti iaxitikiri hĩparĩka ĩki. Itixine hãpokasaaki, hãpakapariko. Apiananiri Kristo

nitiriakori hĩtxaua. ²⁵ Maerekati kamakari apakapariko imisiritiko. Teoso misiritari āti maerekati kamakari, āti maerekati kamakari imisiritini atokotxikana.

4

¹ Hĩte patrão, hĩkamariko atão inakari hinitiriakori ĩkapani. Kona himisirienetapena ninoa. Kotxi hĩte apaka aua hĩpatrãote Teoso tixineẽ.

Apikomoni Paoro Ōtakikakiti

² Kona hĩtakanapapiri Teoso himisãkiretini. Araõkire hĩtxako maerekati mapokakani ĩkapani. Ātipirika hĩtxariko Teoso: “Erekapitikari ikinipoko pikamakiti nota ĩkapani,” hĩtxariko iua.

³ Apaka himisãkiretariko Teoso ate ĩkapani. Hamanaãriko Teoso, iua oerekiniua isãkire apanakinimoni asãpiretini ĩkapani, kotxi anirekari asãpiretiniri kãkiti Kristo pirena, mitxi kãkiti mimarotakiniti. Ikara nisãpiretini xika, kateia āki naua.

⁴ Himisãkiretariko Teoso, Kristo pirena atão nisãpiretini ĩkapani, kãkiti atão imarotini ĩkapani.

⁵ Kimarorerini hĩtxauako Teoso sãkire mauĩãkani sauaki hãuakasaaki. Aãuini poião, ininiã ikiniõtika hinitari kãkiti Teoso sãkire hĩsãpiretini ĩkapani.

⁶ Teoso sikapekai ikinipoko erekari, ininiã hĩsãkirauatakasaaki, hõerekari kãkiti hĩsãkireẽ hĩtiretinina. Iõkira mauakaniã nipokoriã, ! kaposeri. Iua atokotxikana erekari mauakaniã hĩsãkireẽ, kãkiti ! inirekari ikenakotiniri hĩsãkire. Erekari hĩsãkire ininiã, himarotari hãpakapapiretiniri kãkiti.

Paoro Iokanapiretini Pirena

⁷ Txíkiko inakori sãpiretaiko ikinika nota pirena. Aĩtari, atiretakiti itxaua. Iua parĩkauatapitipo Apiananiri ĩkapani. Apiananiri nitiri itxaua atekata. ⁸ Niokanatari iua hĩtemoni, hĩte imaropiretini ĩkapani, hĩte isikataparaxiniretini ĩkapani. ⁹ Niokanatari Onésimo inakori apaka iuakata. Koroso sitatxitikiri iua, hĩte atoko. Aĩtari atiretakiti itxaua apaka. Ātipirika atão iparĩkauata Kristo ĩkapani. Ninoa sãpiretaiko hĩte ikinipoko Kristo sãkire auiãkani kamakiti uai.

¹⁰ Arisitako inakori, notakata kateia ãki auakari, xinikamanapitai hĩte. Panapee itaro ãkiri Marko, xinikamanapitai hĩte apaka. Nisãpiretapekai hĩte Marko pirena. Ininiã ereẽ iua apokasaaki, hĩpoxokoniritika hãpakapariko iua. ¹¹ Xosoe Xósito inakori xinikamanapitai hĩte apaka. Ninoa ipi ãti pakini Xoteoakori notakata parĩkauatakani itxauana. Ninoa parĩkauata notakata, Teoso auĩtetxi ininiua pirena asãpiretini ĩkapani. Isikataparaxiniretanona nota.

¹² Epápara inakori apaka xinikamanapitai hĩte. Ereẽkiri iua. Kristo nitiri itxaua. Ātipirika imisãkiretari Teoso hĩte ĩkapani, Teoso nireẽkitinoka hĩkamini ĩkapani, ikinika hĩkamakiti atãonoka hĩkamini ĩkapani. ¹³ Nota imarotari iteene iparĩkauatini hĩte ĩkapani. Apaka nimarotari iparĩkauata kãkiti Araotxiséia sitatxiti auakani ĩkapani. Apaka nimarotari iparĩkauata Ierapori sitatxiti auakani ĩkapani.

¹⁴ Aĩtari atiretakiti, amianari imarotakari Arókasi inakori apaka xinikamanapitai hĩte. Témasi inakori apaka xinikamanapitai hĩte.

¹⁵ Hĩsãpiretanako aĩtariakori Araotxiséia auakani

nixinikinina ninoa. Hīsãpiretaroko Nĩpa inakoro, Teoso mereẽkini oaãpoko apotiitakaniua pakini, nixinikinina ninoa. ¹⁶ Ia niokanatsopatakiti hātatsopatako hĩkinika hĩkenakotini ĩkapani, eereka hĩpaniãtariko atatsopatiko Araotxiséia sitatxitiã, Kristo sãkire auiãkani kenakotiniri ĩkapani. Apaka hĩte atatsopatariko Araotxiséia auakani iokanatsopatakiti. ¹⁷ Hĩtxariko Akipo inakori: “Pikamariko ikinipoko parĩkatxi Apiananiri paniãtakiti pikamini.” ¹⁸ Nota Paoro niõkatsopatari ia niuakoã: Hĩxinikariko kateia ãki nauini. Teoso sikari ikinipoko erekari hĩtemoni. Ameẽ.

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022
253eaec7-f0c7-5b49-b6be-65ee5354d0ed